

Lo bin claridad riba Cargo Zaak?

Fiscal Hulandes ta exigí "Comision di Berdad" pa investiga escandalo di IRT

ORANJESTAD(AAN) Un fiscal Hulandes a laga hopi hende na Hulanda y algun na Aruba haya ril di miedo den nan curpa ora cu el a declara cu mester bin un "Comision di berdad", cu mester bay investiga esnan cu a enrikece nan mes cu importacion di droga na Hulanda den e famoso escandalo di IRT, cu a laga husticia Hulandes tembla riba su fundeshinan.

Number di pais Aruba tambe a cay den e investigacionnan parlamentario cu señor Van Traa a haci den e escandalo di IRT y di cual Cargo Zaak tabata forma parti.

Te awe na Aruba no tin claridad riba Cargo Zaak cu a tuma lugar na Aruba caminda cantidadnan grandi di droga a pasa via Aruba pa bay Hulanda pa despues desaparece riba e mercado Hulandes y te hasta esun Europeo.

Ministerio Publico den combinacion cu e gobierno di e tempo ey na Aruba a permiti pa ley por a worde kibra pa asina cargamentonan grandi di droga procedente di aparentemente Colombia y Surinam, por a pasa via teritorio di Aruba, pa despues ser exporta pa Hulanda caminda polisnan na un forma ridiculo a perde containernan yena cu droga.

PG Zwinkels su nomber tabata cay pa loco den e famoso Cargo Zaak cu a trece masha hopi tension entre Aruba y Hulanda y cual caso a pone un mancha hopi scur riba e reputacion di ministerio Publico na Aruba y na Hulanda.

Na Aruba nomber di un informante Hulandes Europeo a ser conecta cu Cargo Zaak y despues e asunto aki a bay rebenta cu publicacionnan di cuentanan bancario hopi dudoso cu a bay para te den corte.

Funcionarionan halto den Ministerio Publico na Hulanda hunto cu funcionarionan halto y te na e rangonan abao di polis, tabata meti den importacion supuestamente controla di droga cu lo mester a pasa via Aruba.

E escandalo di IRT a causa un daño enorme na e reputacion di husticia Hulandes y te awe no por a yega asina leu pa sera e caso aki pasobra

keto bay no ta conoci unda tur e placa di droga a bay y ken tabata esnan cu a haya placa.

Tabata tin sumanan gigantescos riba cuentanan bancario na Inglaterra y tambe na cierto banconan Hulandes y ta funcionarionan di ministerio Publico Hulandes y aparatonan policial tabata maneha e cuentanan aki di cual te awe ni na Aruba ni na Hulanda pueblo no a haya sa con exacto e asuntonan aki tabata hinca den otro.

Un di e polisnan cu tabata meti den importacion di droga na Hulanda awor mester bay duna cuenta den corte pa acusacionnan di Meineed y e caso aki lo bay ta uno hopi interesante pasobra e meneer Langendoen aki cu tabata un di e recherchenan cu tabata e orkestradornan di importacion di droga na Hulanda, ta un di e personanan cu por basha abao y menciona nomber di e supuesto informante grandi di cual Ministerio Publico su fiscal Witteveen di Amsterdam ta kere cu ta con-

sisti di un grupo di hende y no un solo persona.

Abogado Spong di e colega di Langendoen, señor Van Vondel cu tambe tabata meti den importacion di droga, a cuestiona fuertemente e caso contra e polis Van Vondel pasobra segun e abogado aki e caso contra e polis ta un caso di camuflahe pa un investigacion penal berdadero.

Spong a bisa: "Un investigacion asina e top di Ministerio Publico no tabata kier pasobra e ora ey segun speculationnan di Spong, Fiscalnan di Ministerio Publico tambe lo mester a worde persigui penalmente".

Spong tabata haya cu Corte mester a declara Ministerio Publico den e caso contra Van Vondel como niet ontvanke-lijk pasobra nan a haci nan mes culpable di "willekeurige vervolging".

Segun Spong tabata tin diferente miembro di Ministerio Publico cu a haci nan mes culpable na Meineed durante investigacion parlamentario

cu Van Traa a haci den e escandalo di IRT.

Si bin e "Comision di berdad" pa investiga ken tabata esnan cu a haya placa den IRT escandalo, anto no por keda afor cu lo bay sali na claridad di dia ta ken tabata esnan cu na Aruba a haya placa den e famoso Cargo Zaak.

E ora ey kizas por bin claridad riba e famoso cuentanan bancario y tambe e rol di e informante Hulandes e ex mariniere cu tabata sera na Aruba y tambe kizas e rol di barco Daniel Leo tambe por sali na claridad di dia.

Miyones a ser hinca den financiamiento di compra y transportacion di cocaína di Colombia via Aruba pa Hulanda y miyones a ser gana cu e benta di cocaína cu supuestamente a bay perdi den cayanan di Amsterdam.

Tempo lo bay muestra si gobierno Hulandes ta dispuesto pa habri e beerput pa asina cabeznan grandi den Ministerio Publico y tambe den politica na Hulanda por cay, pa

asina core cu tur a batatanan putri den a aparato hudicial di Reino Hulandes.

Na Colombia keto bay tin senadornan cu kier haya claridad riba Cargo Zaak pa asina nan cuminsa un caso penal contra tur esnan cu a viola soberania di pais Colombia door di seducccion pa cu exportacion di droga di Colombia via Aruba pa Hulanda.

Recientemente e conocido "Operacion Casablanca" a trece fricciones grandi entre Mexico y Merca pa cu violacion di soberania di Mexico di parti di agentenan di DEA y pa cual Mexico a pidi Merca pa extradicion di e agentenan di DEA, pero Merca a rechaza tal peticion.

Con lo bay para ora cu Colombia pidi extradicion di polisnan y fiscalnan Hulandes cu tabata meti den trafico di droga procedente di Colombia?

TELEFONAN DI DIARIO
826747- FAX 828551